


續修四庫全書



《續修四庫全書》編纂委員會編

續修四庫全書

上海古籍出版社

三七二・史部・編年類

東華錄一百九十四卷東華續錄二百三十卷(乾隆八至乾隆四十九)

王先謙撰

.....一

2290/02

東華錄

東華續錄 四

王先謙
撰

據清光緒十年長沙王氏
刻本影印原書版框高二
一〇毫米寬三〇〇毫米

臣王先謙敬編
臣周潤蕃恭校

秋七月壬子復起彭維新為左都御史○乙卯以徐士林母病未痊命許容兼管蘇州布政使○辛酉諭各省督撫身任地方皆有父母斯民之責於所屬州縣水旱災傷自應速為訪察加意撫綏朕前屢經降旨訓示諒督撫等自能仰體朕心不致玩視民瘼稽延時日朕念水旱之災固宜賑救而水為尤甚旱災之成以漸猶可先事豫籌水則有驟至陡發之時田禾浸沒廬舍漂流小民資生之策蕩然盡待命旦夕尤當速為賑救庶克安全不至流移失所見在成例分別極貧次貧其應行辦賑者原係不待部覆但恐各省辦理不一或仍有拘泥遷延致災民不能及時沾惠者用東華續錄 乾隆八

是再降諭旨嗣後各該督撫可嚴飭地方官凡遇猝被之水災迅文申報該督撫即刻委員踏勘設法賑濟安置一面辦理一面奏聞務使早沾實惠俾各甯居以副朕憫念災黎之至意儻或怠玩濡遲致傷民命或有司奉行不力胥役侵蝕中飽以及借名捏飾浮冒開銷等弊該督撫照例嚴參儻辦理未協積弊未除朕惟於該督撫是問將此永著為例○壬戌諭昨據參領金珩奏稱八旗滿洲蒙古漢軍各省駐防官弁子弟離京遠應試為艱請嗣後科歲兩試令該將軍考試馬步射即送附近府院考試酌量人數多寡以定去取等語朕思此事斷不可行雍正十年間曾奉皇考諭旨國家之設駐防弁兵原令其持戈荷戟以備干城之選非令其攻習文墨與文人學士爭名於場屋也在弁兵之子弟有能讀書向學通曉文義者原聽其來京應試以廣伊等進取之途並

未嘗禁其從事文學今若悉准其在外考試則伊等各從其便競尚虛名而輕視武事必致騎射生疏操演怠忽將來更有何人充駐防之用乎況聖祖仁皇帝臨御六十一年所以教養弁兵者至周至渥如果應行早已著為令典又何待今日之喋喋數陳乎數年以來陳奏朕前者重見疊出不下百餘次其識見甚為庸鄙朕悉置之不論未嘗降旨申飭乃近日仍有不知而妄演者是以特行宣諭以覺愚蒙欽此仰見我皇考睿慮周詳聖諭至為明晰朕臨御以來亦有以此陳奏者槩未准行蓋以滿洲蒙古漢軍在京者人數眾多就近考試原無礙於操演至各省駐防官弁子弟為數無幾若科歲考時不必來京就近在外應試不但事有難行且必至競尚虛名荒廢騎射殊失設立駐防之本意昔謬已極金珩身為參領乃煌煌聖諭豈竟毫無見聞而復混行演奏東華續錄 乾隆八

著嚴行申飭並將此旨宣諭中外臣工嗣後不得以此謬論再行妄演○甲子復設稽查內務府御史○工部尚書趙宏恩以納賄革職○乙丑調史貽直為工部尚書高其倬為戶部尚書○丁卯命查郎阿入閣辦事調鄂彌達為川陝總督以馬爾泰為兩廣總督查克丹為左都御史托特為漕運總督○己巳諭周廷燮奏請蠲除米稅以裕民食朕御極以來加惠民生免賦蠲租不下千萬計算米糧之稅於國課所增幾何何難槩為蠲除以廣恩澤但為民生計有必須詳加籌畫者蓋各省豐歉不一偶遇歉收之省除賑恤平糶撫綏安頓外又特免關樞米稅俾客商圖利爭趨雲集轉運流通此昔日皇考履行之善政近歲朕踵而行之具有成效是蠲免米稅實亦救荒之一策也若平時槩令蠲除則各省地方豐歉盈虛均屬一例富商大賈趨利若鶩歉收之處與

豐收之處毫無分別國家又何以操鼓舞之權而使商賈踴躍從事於無米之地哉惟是各省情形或朕一時未及周知該督撫等當仰體朕軫念民瘼之意遇地方歉收有藉外省接濟者即行奏聞免收米稅如情形孔亟奏請需時者即一面奏聞一面停其輸稅將此永著為例○辛未以喀爾吉善爲戶部左侍郎由內閣學士遷○丁丑大學士尹秦乞休允之○戊寅禮部議准刑部郎中柴鶴山奏科場慎重關防一族之人雖服制稍減而親誼尙存或考官閱文將本族之人取中未免有涉嫌疑請嗣後內簾官子弟及本族之人仍照舊例槩令迴避從之○庚辰原任陝西總督劉於義以狗庇屬員糜費軍需革職○是月貴州總督張廣泗奏古州苗疆自奠定以後各苗皆知畏服而安設軍屯一事實有必應如此辦理之勢今兩廣督臣鄂彌達奏請量移營壘安駐險要擇苗民中

東華續錄

乾隆八

二

爲眾所信服者設立巡檢頭目以約束之至苗民遺產盡行入官安屯恐日後苗民生齒漸繁地少人多必至怨久亂生且屯兵不能耕作仍須召苗佃種其役使凌虐勢所不免等語查該督臣從前請將古州鎮遷設丙妹八寨協移駐爛土汛或荔波縣清江協移駐天柱縣各處均係彈丸之地不能安駐鎮協大營見在新疆以內所有營汛不甚聯絡之處俱請添設汛防又於天柱荔波等處酌量增駐官兵防維周密苗人必不敢再滋事端至苗蠻向無酋長雖有本寨中之強有力者一二人亦不能約束其眾況苗類眾多統以文武鎮以官兵尙敢羣起跳梁又豈一二巡檢頭目所能約束再屯兵之設乃係逆苗內之絕戶田產始行入官其未絕者仍令各本戶照前耕種並未一槩歸屯且新疆未墾之地甚多雖此後苗民生齒日繁亦不至無以資生原不必以日後之地少

人多爲慮其招墾屯戶均係人才壯健可充屯軍者令其承領不許倩人佃種而所設屯田已飭令與苗田標明界址以免攙越侵占並無召苗耕作之事惟所奏屯軍凌虐苗民實爲目前第一要事查苗疆驟安屯軍至八九千戶之多而苗民經懲創之後其勢易於欺凌見已嚴行查禁並擬酌定章程以爲永遠遵守得旨既經卿詳悉敷陳知道了至新疆何處安設屯軍何處仍係苗田何處爲聲勢相聯之鎮協卿其明悉爲圖以進朕將覽焉

八月癸未 上御經筵○錄用賢貢祠大臣子孫○甲申諭御史王峻參奏彭維新一案經九卿兩議上請朕交與大學士等議今議稱彭維新身在制中聞命之後遽制到任應照後議革職等語彭維新朕素不知其人御極之初曾有言其人材可用者朕因伊係 皇考舊臣所犯罪案尙有可原之情與涂天相張楷俞兆晟等俱加錄用未幾伊即以親喪回籍近因左都御史缺員朕以彭維新服制已滿例應起復原官是以降旨補授亦未有在朕前薦場之者今經御史參奏大臣等議以革職乃屬循例常例但當時大臣官員在任守制者頗有之即如彭維新此等情節者亦不止伊一人可將大學士九卿等所議原摺暫行存貯至彭維新之爲人朕究未甚知其從前丁憂後到任之處朕更無從得聞仍著來京候朕召見再降諭旨○乙酉諭御史稽魯奏稱八旗生計艱難請每旗各設一庫每庫用銀五十萬兩借與本旗官員以及包衣兵丁每月每兩令出利銀二分計年終之時每庫可得利銀十二萬兩以五萬兩歸還庫帑餘銀七萬兩散與本旗兵丁十年以後帑銀歸完即將此項銀兩永作八旗公庫等語朕御極之初加恩借給旗人庫銀本期有益生計乃邇年以來細加體察知伊等所

東華續錄

乾隆八

四

領銀兩隨手花費每月扣除額餉於生計轉覺艱難是以降旨豁免未完之項停止再借所降諭旨至為明晰而稽魯復有此奏是誠何心且資本必須營運方能獲利旗人辦事當差日不暇給何術而能坐獲二分之厚息乎原不過隨手花銷而按季按月交納利銀將受永遠無窮之剝削是非欲以厚其生計而轉以腹其膏脂此富彙盤剝小民之計而稽魯反以為養贍資生之良策悖謬極矣又奏稱八旗生齒日繁與其多設養育之方無如廣開登進之路凡近京省城府道州縣副參遊守等官俱宜參用滿洲京營遊守千把俱以滿洲補用滿洲之人農工商買俱非所習除居官為兵外別無養生之策等語國家分職授官量材器使必其人之克勝厥任方可擢授年來滿洲中堪任外官者朕未嘗不量行擢補然不可定為成例蓋八旗官員文則六部院等武則都統參佐

東華續錄

乾隆八

五

員缺甚多材畧儘可施展遵循舊例為官擇人尚恐人材不足何必更開外用之途且其意以登進之路為養育之方尤不可訓文武員弁原藉以分猷宣力為國為民今因資生無策優以官爵將居官者惟利是圖安望其潔己奉公實心任事乎況員缺有限而生齒日繁以此為養贍之法豈非妄亂之甚乎又奏請鑄當十錢每錢一文重四錢當小錢之十見今制錢之五大錢四十文得銅一斤則錢價浮於銅價盜銷之弊可不屏自除並請復設錢行經紀等語錢法一事屢經條奏定議自當漸次清楚若改鑄大錢銅質輕而獲利厚盜鑄之源自此而開奸民私毀制錢改鑄大錢盜銷之弊自此益熾於錢法有益乎無益乎至經紀蠹役經御史條奏革除稽魯又請招募此招募之人能必其即愈於所革之人乎彼所奏三摺持論悖謬妄欲變亂成法今畧撮其大要宣示於眾

稽魯著交部嚴加議處○丙戌諭朕聞本年七月有飛蝗從江南海州禮堰集飛入山東鄒城縣界約長四百里寬二三里不等山東官員督率民夫竭力撲捕旋即飛去未曾傷及田禾朕思飛蝗成陣至數里之廣既從江南飛來而總督那蘇圖並未具摺奏聞則地方官之怠於撲捕可知可即寄信詢問那蘇圖令其明白回奏凡督撫膺封疆之重寄原以惠養百姓為地方第一要務若舍此而言辦事則其所留心者不過未節耳今年江南久旱不雨計地亦廣朕心憂灼無一刻去諸懷抱屢降諭旨多方籌畫而那蘇圖並未先期經理亦未將實情詳悉奏聞今具摺為朕躬祝壽又無一語及地方情形其玩視民瘼顯然可見朕以父安萬姓為心豈有因壽誕之月而暫忘閭閻休戚之理如果經理得宜民人得所則仰慰朕懷所以為朕祝釐者莫大於此若或以萬壽屆期不肯奏及旱潦等事以為寬慰朕懷則尤不知朕心不識大體之甚者矣似此識見朕深為兩江地方憂慮可將此一併曉諭那蘇圖知之○丁亥修南北棧道○命酌定各省緩徵錢糧分別帶徵○己丑諭今日雅爾哈善奏參御史邱玖華條奏九卿各部及督撫等議事不公一摺之外臣聞外人傳說邱玖華另有一摺請將賢良祠大臣之子孫錄用見交大學士密議尚未覆奏而邱玖華輒向人傳說且邱玖華乃勵宗萬之門生久在伊家居住勵宗萬之祖係入賢良祠者故教邱玖華上請以冀復用又恐止此一事或啓形迹之疑故以議事不公等項漫無實據之套語將內外大臣籠統參論以形其剛直不私之槩而以此摺並進名為條陳公事實欲起用勵宗萬等語朕思加恩賢良祠子孫者不過因其家見無出仕之人或給以虛銜或予以微秩亦視其人才尚可錄用然

東華續錄

乾隆八

六

後酌量加恩以示優禮耆舊之意豈有身為侍郎之人緣事獲罪因其父祖在賢良祠而即可復用之理勵宗萬雖至愚亦計不出此至於參奏九卿議事不公一摺實切中時弊近日九卿辦事每多瞻顧廢弛如伊摺中所奏情節諸臣見之各當深自慚懃倍加儆省若更遷怒於建言之人則全不知愧恥者矣朕意雅爾哈善向在辦理軍機處行走明係伊探聽邱玖華摺奏賢良祠之事而反坐邱玖華以自行宣洩之名以博九卿之歡心不然必九卿中有一二不端之人欲中傷邱玖華而示意於雅爾哈善令其參奏不然縱邱玖華自行宣洩彼係疏遠新進之臣何以知交大學士密議尚未覆奏耶此風斷不可長所當究問明晰以示儆戒如邱玖華條奏果有情弊或自行宣洩則自有應得之處分乃雅爾哈善巧詐居心希圖陷害邱玖華以取悅眾人其情實屬欺罔其罪東華續錄 乾隆八年七月更重雅爾哈善著解任此事著莊親王平郡王大學士九卿詹事科道秉公詳確嚴察議奏○建甘肅擺羊戎土城增設兵弁○庚寅工部議准貴州總督張廣泗奏黔省地方鎮遠以上自昔不通舟楫查自都勻府起由舊施並通清水江至楚屬黔陽縣直達常德又由獨山州屬之三腳里達來牛古州抵粵西屬之懷遠縣直達粵東乃天地自然之利請在各處修治河道鑿開縉路以資輓運而濟商民從之○癸巳設各部院督催所○丙申以納爾泰為內閣學士由光祿寺卿遷○戊戌諭朕覽王大臣等所議雅爾哈善參奏邱玖華一摺全未盡心據雅爾哈善原奏內稱御史邱玖華奏九卿各部及督撫等議事不公一摺奉旨交議越數日臣聞外人傳論云邱玖華是日另有一摺請將賢良祠大臣之子孫錄用交大學士密議尚未覆奏而邱玖華輒向人傳說等語此數語究係出自何人之口並未究詢不知爾等所審者何在又雅爾哈善在爾等前供稱陳履平向我說邱玖華另有請用賢良祠大臣之子孫一摺本意專為起用勵宗萬我問此事大約是揣摹之言勵宗萬做過大臣如何因此使得復用陳履平云此事紛紛傳為笑談如何是揣摹之言等語勵宗萬身為侍郎豈有因賢良大臣之子孫便復官之理此朕前日所降之旨而雅爾哈善捏稱為與陳履平問答之詞藉為枝梧之計詐偽顯然若從前果有此語則其心疑而不信矣既疑而不信安得有此參奏之舉以此詰問伊斷無辨處爾等並不置問何也王大臣等皆屢經審訊重大案件之人豈竟見不及此耶雅爾哈善種種應行詰問之處俱含糊了結而將一傳說浮話之陳履平與雅爾哈善一體議以革職明係朕嚴飭雅爾哈善欲治其罪而爾等遂遷怒於陳履平也且雅爾哈善雖革去文官尚有武職陳履平一經革職便屬齊民輕重失倫莫此為甚王大臣等如此辦事殊非朕委任之意姑念此案尚非必應徹底窮究之事特降旨曉諭俾各儆省雅爾哈善著革職並將佐領革去陳履平著交部議處○己亥 上以 世宗憲皇帝三週年恭奉 皇太后謁 泰陵啓鑒○壬寅 上謁 泰陵○癸卯 上詣 泰陵行三週年祭禮奉 皇太后回鑾○甲辰減直隸正定府城河地畝額賦並免逋賦○乙巳以奉天山東豐收准海運至天津平糶○丙午 上奉 皇太后駐蹕南苑 上行圍九月庚戌朔 上自南苑奉 皇太后還宮○濬江南甘泉泰州支河○癸丑以劉吳龍為左副都御史由通政使遷○乙卯諭本年江南旱災除免漕外額糧均准折徵○丙辰給遣犯攜眷口糧○丁巳定湖南湘鄉瀏陽湘陰等三縣額賦比照長沙縣則例徵收歲

減額徵銀二萬一千九百六十四兩有奇○辛酉諭原任大學士白璜向在巡撫任內有清廉之名告休之後緣事革職今聞病故著給還大學士職銜以示優待舊臣之意○壬戌免山東雍正十三年民欠○癸亥諭大學士嵇曾筠在浙年久今海塘工程漸次就緒著入閣辦事永定河工關緊要嵇曾筠熟諳河務到京之後往來河干指示機宜於河道自有裨益至伊辦理海塘數年經畫得宜著有成效著交部議敘○裁浙江總督復設巡撫仍歸閩浙總督管轄○以福建總督劉玉麟為閩浙總督調盧焯為浙江巡撫以王仕任署福建巡撫喬學尹署福建布政使○甲子直隸總督李衛奏總河朱藻挾詐欺公貪殘虐民各款得旨解任命訥親孫嘉淦往鞫以顧琮管總河印務○丙寅命籍隸大興宛平科道迴避巡城○丁卯諭總管太監等毛圓永泰張明慈格胡世傑奏事太監王常貴張玉柱劉萬春張玉擅與李衛交談伊等身係內監如何可與總督聚語李英謝成在旁親見不行管束亦與李衛接談王守貴係伊等首領全然不知管教著將王守貴從重治罪李英謝成及奏事太監四名一併議罪具奏小太監等每人重責四十板○戊辰以沈起元為河南按察使由江西驛○壬申上御懋勤殿句到雲南貴州四川廣西情實罪犯論大學士等曰凡此小民陷於罪戾大都由飢寒切膚及教化未逮而然我君臣皆任其責豈能無愧若不於萬無可貸之中求一縷之生路朕心實有所不忍所當原情察理審度再三固不可有姑息之心尤不可無哀矜之念必求生不得然後置之於法則死者毫無遺憾而刑法得其平矣○甲戌諭尹秦著舊老成宣力年久皇考選拔於退休之後屢加擢用存陟綸扉甯靜和平奉職維謹去年伊

子尹繼善來京陛見朕因尹泰年已衰邁留尹繼善在京授為刑部尚書以便朝夕奉養伊旋以老病乞休朕慰留再三始允所請今夏舊病復作特賞太醫診視冀其痊可今聞溘逝深為軫悼已命散秩大臣率領侍衛賜奠茶酒著加太子太傅於應得卹典外加祭一次以示優禮舊臣之至意尋予諡文恪○乙亥浙江海塘工竣○吏部議准湖廣總督宗室德沛奏寶慶府屬城步縣距靖州甚近請改隸靖州寶慶府理猺同知原管綏甯武岡城步新甯等州縣請將城步綏甯二縣分令靖州州判管理加理猺字樣歸辰永沅靖道轄其寶慶府理猺同知止管武岡州新甯縣務從之

冬十月庚辰朔命查直隸渠淀毋許民間私築堤壩○免直隸江蘇安徽被災州縣遺賦○辛巳諭向令各省督撫保薦所屬教官者原為其文品兼優才能出眾是以加恩格外以優待之為督撫者當存慎重之心方不負國家甄別人材之典乃數年以來各督撫舉薦來京引見者未見有卓越之才猶幸所舉不多尚未至於大濫惟尹會一舉二人到任未久而舉薦之員多於他省此不過冀屬官之感激稱頌遂輕忽以從事也如此次張楷所舉之侯執信乃由署知縣題請改補教職者則其人之才具可以槩見尹會一所舉之葉徵麟乃從下第舉人中揀選發往者若論俸次則應升知縣之期尚在十數年之後張楷尹會一將此等人保薦冀邀逾格之恩甚屬不合著交部議處以為沽名市恩者戒侯執信葉徵麟著回原任不准帶領引見○辛卯上奉皇太后幸甯壽宮視皇次子永璉疾是日皇次子永璉薨朝五日○諭二阿哥永璉乃皇后所生朕之嫡子為人聰明貴重氣宇不凡當

日蒙我 皇考命為永璉隱然示以承宗器之意朕御極以後不即顯行冊立皇太子之禮者蓋恐幼年志氣未定恃貴驕矜或左右諂媚逢迎至於失德甚且有窺伺動搖之者是以於乾隆元年七月初二日遵照 皇考成式親書密旨召諸大臣面諭收藏於乾清宮正大光明扁之後是永璉雖未行冊立之禮朕已命為皇太子矣今於本月十二日偶患寒疾遂致不起朕心深為悲悼朕為天下主豈肯因幼殤而傷懷抱但永璉係朕嫡子已定建儲之計與眾子不同一切典禮著照皇太子儀注行元年密藏扁內之諭旨著取出將此曉諭天下臣民知之○甲午諭據漕運總督托時奏稱戶部尚書高其倬舟抵寶應縣病劇身故高其倬係宣力年久之大臣今節用來京中途溘逝深為悼惜其柩擬回旗著沿途文武官弁護送照看尋子祭葬諡文貞○召寶唐瑛來京以方東華續錄

顯為四川布政使由貴州入○乙未 皇太子金棺發引 上幸顯芳殿賜奠○丙申調任蘭枝為戶部尚書趙國麟為禮部尚書史貽直為刑部尚書以趙殿最為工部尚書調楊永斌為吏部右侍郎由禮部調○丁酉諡 皇太子永璉為端慧皇太子○李衛因病解任以孫嘉淦署直隸總督○庚子諭士子以品行為先學問以經義為重故士之自立也先道德而後文章國家之取士也黜浮華而崇實學我朝養士已將百年漸摩化導培植甄陶所以期望而優異之者無所不至為士者當思國家待士之重務為端人正士以樹齊民之坊表至於學問必有根柢方為實學治一經必深一經之蘊以此發為文詞自然醇正典雅若因陋就簡止記誦陳腐時文百餘篇以為弋取科名之具則士之學已荒而士之品已卑矣是在各省學臣諄切提撕往復訓勉其有不率教者即嚴加

懲戒不少寬貸至於書藝之外當令究心經學以為明道經世之本其如何因地制宜試以經義俾士子不徒視為具文者在學政酌量行之務期有益於膠庠各省亦不必一轍我 皇祖御纂經書多種紹前聖之心法集先儒之大成已命各省布政司敬謹刊刻聽人印刷並准坊間翻刻廣行恐地方大吏不能盡心經理則士子購見仍屬艱難不獲誦讀著督撫藩司等善為籌畫將士子應讀之書多為印發以為國家造士育才之助○免福建臺灣鳳山等廳縣額徵社餉減徵臺屬各縣贖番地貼餉銀之半○壬寅上幸田村賜奠 端慧皇太子○甲辰命江南招商接濟災區○乙巳諭李衛才猷幹練實心辦事封疆累任宣力多年勇往直前無所瞻顧顧輟重地正資料理前聞患病沈重准其解任調治特遣太醫診視頒賜藥資其痊可令聞遠逝深為悼惜著侍衛東華續錄

往奠茶酒柩輓起程之日除該省官員照屬員之禮奠送外其經過地方文武官員在二十里以內者俱差人護送照看出境所有應得卹典該部查例具奏尋子祭一次造墳立碑諡敏達○實授孫嘉淦直隸總督以甘汝來為吏部尚書楊超曾為兵部尚書安圖署廣西巡撫嚴瑞龍為湖北布政使彭家屏署湖南按察使由直隸清河○調呂耀曾為倉場侍郎陳世倌為戶部左侍郎○丙午實授顧琮直隸河道總督

十一月己酉朔諭大學士尚書內原品休致大臣著給食全俸將此示為定例從前已降諭旨若自行奏請朕加恩准令原品休致者著即照此旨給食全俸其過京察自陳朕加恩准令原品休致者著該旗該部查明應否准食半俸之處具奏請旨若非自行奏請朕特旨令其原品休致者及過京察自陳部議致仕人員不必

給食俸祿至於八旗武官員呈告退俱有量其軍功給食俸祿之例嗣後一二品武職大臣若自行奏請朕加恩准令原品致仕者著該旗將伊軍功及食俸年分查明或給食全俸或給食半俸之處具奏請旨若非自行奏請朕特旨令其原品致仕者不必給食俸祿○吏部議准兩廣總督鄂爾達等奏廣東瓊州府孤懸海外北與雷州府相近米穀貨物俱賴雷州販運接濟向有巡道一員統轄二府權其緩急隨宜料理雍正八年分肇高廉羅道轄之高廉二府雷瓊道轄之雷州一府添設高雷廉巡道一員駐紮高州改雷瓊道為海南道止轄瓊州一府駐紮瓊州不特控制難周即瓊民日用亦多未便請復海南道為雷瓊道改高雷廉道為高廉道各兼兵備道職銜從之○壬子諭直隸河工自應總督會商總河辦理前著李衛不必辦理者以伊等彼此不和於公事無益故

東華續錄

乾隆八

上

耳今孫嘉淦並不似此著仍照舊例亦兼管河工事務○乙卯

上幸田村賜奠 端慧皇太子○諭軍機大臣等每科主考差往各省彼此督撫有無餽送路費向無定例其數目之多寡亦無成規伊等回京時有奏聞者有不奏者亦不畫一自應酌定一例俾永遠遵行庶無輕重不均之事今朕酌量道途之遠近分別路費之多寡雲南八百兩貴州七百兩四川廣東廣西福建湖南六百兩江南浙江湖北江西陝西五百兩兩河兩山山西山東四百兩兩等可寄信各督撫遵照此數不得以私意增減主考等亦不得於此數之外更有所受將此示著為例○丙辰實授阿克敦工部右侍郎○己未鑲黃旗漢軍都統納穆圖等奏請年羹堯之子孫年秀等可否准其考試當差得旨年羹堯乃叛逆不臣之人蒙我 皇考施恩念伊曾在青海著有微勞因將伊子孫發往極邊煙瘴者

俱赦宥回京已屬格外之恩今伊等呈請考試當差該旗都統等遵行奏請甚屬錯謬著將原摺給還○癸亥命八旗包衣歸漢軍考試○丁卯命修 福陵石隄○赦河南山東漕糧十萬石留貯津倉續賑平糶○吏部議准閩浙總督郝玉麟奏閩省霞浦縣屬桐山地方襟海環山離縣遠控制難周請建立縣治所有霞浦近桐之入都至二十四都民屯田畝徵徵銀米撥歸新縣管轄從之命縣名曰福鼎○己巳吏部議准廣西巡撫楊超曾奏廣西泗城鎮安二府應各添設附郭縣從之命泗城縣名曰凌雲鎮安縣名曰天保○庚午准河南祥符等三十三州縣額徵匠價攤入地糧○大學士嵇曾筠以病乞回籍允之○吏部議准甘肅巡撫元展成奏蘭州省會請移駐知府以符體制應將臨洮府知府及附府狄道縣移駐蘭州原駐蘭州知州移駐狄道同原轄之金縣河

東華續錄

乾隆八

上

州渭源俱隸移駐省會之知府轄鞏昌府屬靖遠縣改隸移駐蘭城之知府轄從之○壬申甯夏將軍阿魯奏甯夏地震水涌新渠寶豐縣治沈沒發蘭州庫銀二十萬兩命兵部侍郎班第馳往賑恤○甲戌命中書助教等官中式准留原任○飭辦賑州縣侵漁入己者擬罪不得援減○乙亥給河東管河佐雜官養廉○吏部尚書性桂乞休允之○朝鮮國王李昉請頒明史朝鮮列傳允之○丁丑免直隸宣化各府州屬通賦及旗退入官地畝租賦○戊寅立算學○大學士管川陝總督查即阿奏章嘉胡圖克圖奏請將裏塘巴塘佳塘等處賞給達賴喇嘛經議政大臣會同部臣密議可否給還或有無不便情節令臣悉心籌畫並咨商雲南總督慶復妥議具奏本年五月謹就微臣意見將不便之處具奏蒙頒諭旨達賴喇嘛用度不敷著於打箭爐所徵稅銀內每年給銀五

千兩在案茲據慶復議覆滇省所屬中甸與川省裏塘巴塘佳塘等處情勢相同從前未歸內地之時頗多不便歸滇以後設弁管轄迄今甯謐應將裏塘巴塘佳塘並甸甸等處照舊各歸川滇未便仍給達賴喇嘛管理與臣前奏意見相符得旨所議是知道了十二月己卯朔調訥親為吏部尚書以鄂善為兵部尚書調喀爾吉善為吏部左侍郎轉申珠渾為戶部左侍郎調留保為戶部右侍郎由調○辛巳定雲南煙瘴官三年俸滿例○癸未移江蘇劉河舊城於苗匪增崇明鎮兵弁○召戴永椿來京以孔傳煥為江蘇按察使兼署布政使由江蘇鹽運使○乙酉命尚書鄂善議政處行走○丙戌諭前左都御史缺出朕因彭維新係服滿候補之員將伊補授嗣御史參奏大學士等以伊服內不應到任議令革職朕以素日不知彭維新之為人諭令來京再降諭旨今彭維新到京

東華續錄

乾隆八

十五

奏稱雍正十三年十月十三日命臣署理左都御史臣以未經到任則終制下忱難於仰達是以於十月十八日到任隨繕本奏懇終制等語彭維新於十三日奉旨署印之後十八日未到任之先曾經謝恩奏事並非未到本任即不能奏達終制下忱者何得引此以卸己過至伊被參之後雖聞召旨亦應在籍具奏辭職今親自來京而辭職之語亦甚泛泛是其戀職之心顯然可見著照大學士等原議革職其左都御史員缺著魏廷珍補授○除湖南正江縣加攤糧銀○戊子除湖北房縣保康二縣及河南省雍正十二年虛報地畝額賦○甲午諭守令為親民之官最關緊要而邊疆之地民夷雜處撫綏化導職任尤重更不得不慎選其人以膺牧民之寄查雲貴諸苗向在王化之外為害地方近來改土設流漸次安輯然瘡痍初起元氣未復必得循良之員恩信兼著調

劑咸宜者令其心志帖服然後可以久安無事近時督撫於苗疆重地多擇能員以資彈壓殊不知矜才喜事之輩飾文貌以欺耳目圖聲譽以求升遷非有實心實政以為撫綏化導之本究於苗疆無所裨補夫苗夷雖極頑悍然亦具有人心非不可至誠感動者果得廉靜樸質之有司視同赤子勤加撫恤使之各畏其妻孥安其田里俯仰優游一無擾累諒無有不可以革面革心者嗣後遇有苗疆要缺應令該督撫慎選賢員以居其任三年之後察其漢夷相安羣情愛戴者保題升擢以示優獎其有恃才貪功者雖有才幹不得輕任以滋事端其如何定例之處著九卿妥議具奏至於文武不和乃地方之大患其在苗疆更宜嚴禁而重懲之嗣後若有懷挾私意彼此齟齬致誤公事者該督撫提臣即行題參從重議處毋得姑容○除貴州思南等府縣虛報地畝額賦○八

東華續錄

乾隆八

十六

旗通志成○丙申諭向來四川火耗較他省為重我皇考暨朕陸續降旨裁減已去其半無非加惠小民使比戶受輕徭薄賦之恩也今聞該省耗銀雖減而不肖有司巧為營私之計將毀頭暗中加重有每兩加至一錢有餘者彼收糧之書吏傾銷之銀匠又從而侵漁之則小民受剝削之害不小矣川省如此他省可知著各省督撫轉飭布政司遵照徵收錢糧之天平法馬製定畫一之數飭令各州縣確實遵行仍不時密行稽查倘有絲毫多取者即行嚴參治罪毋得姑容如或失於覺察該督撫藩司不得辭其咎○革朱藻職○以梁詩正為內閣學士由翰林院侍讀學士遷○戊戌發帑銀一百萬兩修濬江南水利命大理寺卿汪雁前往督辦○王大臣等議覆履親王允禩等奏定端慧皇太子安葬葬地一切典禮端慧皇太子吉兆應尊稱園寢造享殿五間兩廡各五間大

門五間琉璃花門三座燎鑪一座覆以綠瓦題主時禮節敬擬牛一羊二奠帛爵讀文致祭嗣後祭祀儀與 妃園寢同從之○準噶爾台吉噶爾丹策零遣哈柳等隨侍郎阿克敦等奉表至京表曰準噶爾台吉噶爾丹策零具奏恭進 大皇帝聖明去年令達什等以阿爾台遊牧事具奏奉 大皇帝諭旨爾請喀爾喀與厄魯特以阿爾台山為界俱照見在駐牧無相掣肘言辭恭謹朕甚嘉之故復遣使前往幸蒙 聖恩鑒允不勝懼忭又 諭旨有云分界之處尚未指明蒙古遊牧無定若不指定山河為界日後邊民生艱於久遠之計仍無裨益前者我遣吹納木喀具奏亦正為此耳今議定界請循布延圖河南以博爾濟昂吉勒圖烏克克嶺噶克察等處為界北以遜多爾庫奎多爾輝庫奎至哈爾奇喇博木喀喇巴爾楚克等處為界我邊界人等仍在山後遊牧不得東華續錄 乾隆八

越阿爾台嶺其山前居住蒙古部人止在扎下堪等處遊牧彼此相距遼遠庶可兩無牽涉謹此具奏前者彼此致生嫌隙止以 大皇帝兵至科布多遂於界內築城駐兵之故今托爾和等處恐復如此惟 大皇帝區處若蒙見允邊界自此而定卡倫大半向前其布延圖托爾和二卡倫並在我國境中亦祈 大皇帝垂鑒再車臣汗告我使人班禪額爾德尼已經圖寂詢來使云是實我厄魯特經典中載班禪額爾德尼乃掌教大喇嘛也如果圖寂當建塔誦經意欲遣我人赴藏布施以廣黃教以福羣生奏入報聞○庚子諭前據總督張廣泗參奏張照在黔糜費軍需銀兩摺內特標百萬軍需於前而下文參其任意支領是顯然軍前所用錢糧皆張照經手之項是以朕降旨令其賠還十分之八後又有人奏稱張照經手錢糧止派發各府銀十三萬兩之數此外與伊無

涉朕令戶部行文張廣泗確查具奏今據張廣泗查奏張照經手錢糧止發過銀二十五萬餘兩是此數與原奏迥不相符且遲至二年之久始行覆奏顯有迴護原參礙難措辭之處張照在黔辦理軍務與哈元生等意見參差不能和協朕是以降旨撤回加以處分又因張廣泗有糜費錢糧之參奏是以照例責以賠補並非從前深惡張照而於不應著賠之項罰金以懲之也今細覽張廣泗查奏之摺是張照本無應賠之項何得強令賠還朕惟以大公辦理天下之事初無成見成心並非此時嘉獎張照而欲枉法以寬之也若照戶部所議復令張廣泗再查伊仍不免瞻顧難於回覆此案交與辦理軍機大臣秉公妥議具奏○丙午準噶爾使臣哈柳等入覲諭曰去年爾來使達什等齎噶爾丹策零奏章言詞恭順朕故遣使往諭此次所奏乞令托爾和布延圖兩處卡倫稍

稍內移此事斷不可行便與不便爾等亦知之且我 聖祖皇帝時所設卡倫至今豈可移動乎但噶爾丹策零所云遊牧不敢越阿爾台尚近於理念爾等遠來召爾入見若噶爾丹策零止請彼此不越阿爾台此次便可定議乃復言及卡倫故朕令大臣等與爾再議爾為噶爾丹策零大宰桑爾台吉本意爾無不知除所奏外尚有口屬之言否哈柳奏云並無口屬之言但前者以 大皇帝之兵於科布多築城駐兵致起釁端今噶爾丹策零之意以托爾和布延圖離科布多甚近恐日後復於兩處築城駐兵故奏請乞恩耳 上諭曰見今噶爾丹策零所奏不使遊牧卡倫越阿爾台甚屬信實朕甚嘉之至托爾和布延圖等處朕已降旨斷不修築城屋駐紮兵丁朕為中外共主所諭豈有改變之理爾等還其詳記朕旨曉諭噶爾丹策零哈柳奏言祈 大皇帝以所降諭旨

繕寫特遣使臣往與噶爾丹策零面議 上諭曰無庸遣使爾等起程時另有敕書卽付爾等頒示噶爾丹策零○丁未直隸總督孫嘉淦奏禁止燒鍋侍郎方苞又申前議且謂直隸山東兗今奉行未聞民以爲病欲將南北各省俱行禁止並欲禁止種煙經大學士等議覆無論豐年各省一體通行嚴禁卽宣化之苦高粱山陝之棗柿葡萄等物亦不許復用釀酒種煙之地自乾隆四年爲始悉令改種蔬穀種煙之人照私開燒鍋例治罪臣聞卹鈔中心駭懼卽以直隸而論前督臣李衛任內一年拏獲燒鍋踴趲三百六十四起人犯一千四百四十八名臣抵任一月拏獲燒鍋運販七十八起人犯三百五十五名凡此特申報總督衙門者耳各府州縣自結之案尙不知凡幾特拏報在官者耳吏役兵丁已拏而賄縱得規禮而不拏者尙不知凡幾特酒犯之正身耳本地之鄉東華續錄 乾隆八年 九
保鄰甲沿途之腳夫店家牽連而受累者又不知凡幾一省如是別省可知酒禁如是煙禁可知煙酒之禁果行四海之內一年之閒其犯法之人破產之家不可勝計矣以飲食之故舉萬千無罪之人驅而納之桁楊箠楚之下果欲建萬世之長策致吾君於堯舜似不應爲此言也見今直隸大小衙門皆有封貯之酒與酒及器具變價之銀未變之酒棄之則可惜貯之則無用賣之則失體已變之銀或欲以賞民役或欲以修衙署或欲以充公費官吏兵役虎視眈眈以挈酒爲利數百姓嗷嗷弱者失業強者犯令十百成羣肩挑背負鹽梟未靖酒梟又起山東之事臣不詳知直隸情形則所目覩若謂煙酒可以永禁而百姓因此感悅臣實不敢爲此飾說也夫天下事爲之而後知履之而後難從前禁酒禁麴之議不惟大學士九卿等俱屬紙上空談卽臣言宜於歉歲不宜於

豐年猶是書生之謬論身親辦理逐案發落乃知貧民之貲財而狼藉之毀民之肌膚而敲朴之取民之生計而禁錮之饑饉之餘民無固志失業既眾何事不爲則歉歲之難禁似更甚於豐年周禮荒政舍禁去幾有由然也書曰無稽之言勿聽謂立言而必有事以證之也今大學士及方苞等所議皆係空言不適於事臣不敢復以空言指駁謹將直隸燒鍋踴趲一切案件撮其條目繕呈御覽此則信而有徵之事非臣所能臆造也得旨此奏朕俱悉矣但將此發議於國體甚有關係朕自有酌量也○管蘇州織造郎中海保遵旨覆奏蘇州巡撫許容從前歷任俱有刻薄之名觀其到任以來操守廉潔精細明白實心任事聲名亦好得旨此奏至公之論也○是歲朝鮮琉球安南來貢

東華續錄

乾隆八年

二十

東華續錄

乾隆九

臣王先謙敬編
臣周濟蕃恭校

乾隆四年己未春正月己酉 上御乾清宮西暖閣召王大臣翰林科道及督撫學政在京者九十九人賜宴賦柏梁體詩 御製序曰我 皇祖聖祖仁皇帝 皇考世宗憲皇帝嘗集在廷諸臣於乾清宮肆筵設席授以筆札 御製首唱羣臣以次遞成效漢代柏梁之體續虞廷廣歌之義光垂奕世猗歟盛矣朕敬承丕緒惟日孜孜期與百爾羣工共圖治理言念股肱之佐卿尹之班何一非我 祖考所貽以與朕寅亮天工者哉宗室屏藩之寄則又派衍天潢分所宜親也宜有以篤親親之情敘堂廉之誼乃者臘雪盈囀已兆二麥之稔光風應律初回大地之春爰集王公卿貳東華續錄 乾隆九

授几賦詩一如舊制朕非欲誇詞藻以寵羣臣倡為豐亨豫大之說也思 祖考遺朕以昇平之業吾君臣何幸得優游以享之夫享昇平匪艱而保昇平為難羣臣其體朕意焉一宴會之樂尚思繼 祖考之庥 祖考之良法善政布在方策吾君臣其何以立綱陳紀罔續甯人以親揚 祖考之光烈乎羣臣其體朕意焉○壬子截留江蘇漕糧二十萬石備賑○召張鳴鈞來京調范琛為直隸布政使以朱定元為河南布政使原任浙江○癸丑命通政使德爾敏往江南同大理寺卿汪漣督辦水利○乙卯軍機大臣議奏張照在黔糜費軍需一案經總督張廣泗確查除發過軍需賑務銀二十五萬六千餘兩外餘皆存貯道庫提解藩庫實無應賠之項請免查追從之○庚申諭工部侍郎王紘前以年老乞休朕未俞允今又閱三年看伊精力較前不逮准以原品致仕○辛

西 皇四子永瑛生○甲子轉張廷璩為工部左侍郎起韓光基

為工部右侍郎原任工部○壬申命趙國麟為大學士調任蘭枝為禮部尚書以陳惠華為戶部尚書梁詩正為刑部右侍郎學士通○癸酉諭大學士稽曾筠才品優長老成練達久任河道總督懋著勤勞繼膺浙督之命經理海塘工程漸次就緒朕心嘉悅念其外任多年宣召入閣辦事旋聞身患痰疾精力衰頹特遣伊子稽璜回南省視並頒藥藥准其回籍調養以俟痊可入都嗣聞病勢加劇正遣太醫馳往療治不意溘焉長逝深為傷悼其應得卹典該部查例具奏外著加贈少保加祭一次以示恩禮大臣之至意尋予諡文敏○丁丑減浙江嘉興等七縣額賦

二月己卯 上御經筵○許容丁憂調張渠為江蘇巡撫以馮光裕為湖南巡撫陳惠榮署貴州布政使宋厚署貴州按察使由古東華續錄 乾隆九

○壬午諭戶部所奏各旗省虧空入官未變價之房產德明等五案俱著給還昔我 皇祖臨御六十餘年政崇寬大而內外臣工奉行不善怠玩成風遂致辦事暗藏弊端國帑率多虧空我皇考欲正人心風俗之大綱有不得不釐剔整頓之勢此乃出於萬不容已者迨經理十餘年後人心漸知畏法風俗亦覺改移以時勢觀之可以施醇厚大之政朕是以將歷年虧空之案其情罪有一綫可寬者悉予豁免即已經入官之房產未曾變價者亦令該管衙門查奏給還在此時之臣工受朕寬宥之恩未嘗不感激歡欣俯仰舒暢殊不知從前虧空之所由來皆因心無顧忌不復知有法網以致由小而大由寡而多日甚一日本身既獲重罪子孫猶被餘殃其害有不可勝言者矣古人云漸不可長欲不可縱朕看今日內外臣工見朕以寬大為治未免漸有放縱之心即如今

日工部奏 太廟慶成鐘一事遂大有浮冒而工部司官營私作弊之事屢經提督衙門奏參則其他衙門與此相類者正恐不少謂之無弊可乎國家動用錢糧如果有益於兵民即數百萬金亦所不惜若被官吏侵漁私入囊橐即纖毫亦不可假借此防微杜漸之道也現在京職官俱已加添雙俸外省大小官員又皆給與養廉伊等養贍之資較從前已覺寬裕不應更有營私作弊之念自罹罪譴如果能奉公守法將來國用充足朕何難再為加恩奈何不勉為清白以受天家優渥之澤而貪圖一時之小利置身家性命於不計乎總之朕施寬大之政而諸臣亦當行謹飭之心諸事秉公絕去弊竇則可以成朕寬大之治而長享福慶於無窮若因寬成玩故智復萌則姑容於此日者朕必綜覈於將來即朕之子孫亦必無聽其玩法欺公不加重懲之理是不肖臣工縱能倣

東華續錄 乾隆九年

三

倖於一時仍不能脫然於身後人非至愚亦當猛省及此況我皇祖 皇考之寬嚴相濟乃審時度勢至當不易之成憲後世子孫豈能外此以求治天下之道乎古人云水至清則無魚人至察則無徒此言在上者當如此存心耳若人臣不知謹守繩墨而欲以此為自便之術則諸弊滋長國法廢弛又豈可以為訓乎將此曉諭內外大小臣工共知之○命給入閣士子炭○丁亥諭朕昨閱工部月摺內辦慶成鐘銀三百兩錢二百串等語朕因工部工程近來每有冒銷之弊看來此鐘不過畧為黏補修理何至用銀如許之多且朕恭祭 太廟時見鐘穗顏色俱已不鮮是以降旨令工部堂官詳查具奏今據工部查奏內稱新造慶成鐘發過銀三百兩錢二百串係豫領之項俟報銷時將應我應繳之處覈實准銷等語凡有工程例應先估後領豈可一任司官冒領侵漁

縱有繳還亦不過因朕降旨查察比尋常多交數十兩豈有將大半繳還之理明知浮冒始令查奏該堂官等竟以朕為不諳事務並不據實查奏任意飾詞蒙混甚屬乖謬著將工部堂官等交部嚴加議處○己丑以蔣溥為內閣學士由翰林院侍讀學士遷○丙申賜琉球國王向敬 御書扁額○免湖廣永順永綏新開苗疆鹽課○免浙江上虞等縣積欠○庚子賜準噶爾台吉噶爾丹策零敕書曰前歲爾遣達什等進奏言辭恭順朕甚嘉之因分界之議未曾指定地名故朕又命侍郎阿克敦等前往與爾分別定議今爾遣哈柳同來疏言今欲定界請循布延圖河南以博爾濟昂吉勒圖烏克克爾噶克察為界北以遜多爾庫奎多爾多輝庫奎至哈爾奇喇博木喀喇巴爾楚克為界厄魯特無踰阿爾台嶺蒙古亦止在扎卜堪游牧伏乞大皇帝睿鑒夫定界之議非自今始爾父策

東華續錄 乾隆九年

四

妄阿喇布坦已經陳奏誠以喀爾喀游牧原無定處必指定山河為界庶彼此不致紛爭朕為天下共主無分畛域一視同仁凡有奏請可行則允之不可行則卻之雖百請亦不允也爾言厄魯特無過阿爾台游牧其言近理朕即信之又請蒙古止居扎卜堪見今蒙古游牧原未嘗踰扎卜堪也爾又請托爾和無築城駐防朕既降旨撤兵托爾和等處安得復如前此科卜多有築城駐兵之事已面諭爾使哈柳矣必無改悔之理也但爾請循布延圖河南以博爾濟昂吉勒圖為界北以遜多爾庫奎等處為界謂卡倫大半向前布延圖托爾和兩卡俱在爾國界中意欲我卡倫稍向內移此必不可行之事爾豈不知乃復牽率而言乎况設卡防守所用不過數人何關輕重然自我 聖祖時設立之卡倫豈可於今忽移動之乎夫休兵息民永歸和好即定界與否亦非要事但使彼此游牧